

陳忠裕公全集

五十二冊

陳忠裕全集卷十

青浦王鴻逵用儀

婁縣莊師洛莼川

青浦王昶德甫輯

青浦趙汝霖惠蒼

編訂

青浦何其偉韋人

七言古詩

幾社橐

昆明池治水戰歌

考證陝西通志昆明池在西安府城西南三十里蔡氏廣輿記漢武欲伐昆明鑿

池以習水戰刻石為鯨魚每雷雨則鳴鬚尾皆動

滇雲北開照漢月楚南積水光沖融酷烟布絕大秦道

荒唐旄節啼腥風黔巫壓翠綠波死崑崙浴象搖龍宮
巴嶙暑飲毒溪水踏歌蠻女攀雄虹漢威不到劉郎怒
割石燒空翦銀浦旋風捲土移洪濛劫灰飛盡贛羊舞
長安城西星浸池秦家蒼壁神靈雨清秋碧落鷓鴣遊
樓船激浪中流鼓高牙轟天日犯旗黃姑愁絕雲莽莽
鸛鵝唳藻聲徘徊老蛟失翼青兕哀壯士學技夜郎國
美人倚望通天臺支祈尺郭移下瀨威名遣作天南雷
炎州小水入涇渭印竹枸醬端然來從此昆明靜春碧
宮娃染紅青草隈元狩三載工作始叱咤滇王受漢璽
幅員不數義與軒茂陵龍孫眞天子

廢苑行

荒郊落落行日暮短牆旁屬大堤路苑門零藉不安橫
芳草何年滿階布餘花小紅猶照池碧叢化蝶還能妬
燕雛空自有春秋子規煩厭啼風雨陰竹窈窕山鬼立
夜久燐光在高樹樹影搖月月更涼疑有香魂夢中度
昔時美人年尚芳層城素宇遙相當傳宴樓頭半鸚鵡
焚香被底雙鴛鴦紫阮撥絃來古墓明珠懸幕開中堂
白日欲暝水欲竭鶯花不得常翱翔舊家亭臺尚未改
昔人已去徒悲傷藤蔓經過蔽幽室架上猶垂紅繡裳
牀前白粉與獸炭其中往往存都梁雨後流沙洗階屺

折釵碎玉相輝光可憐壁閒剝題字當時一咏飛千觴
卽今太平良不易變遷蕭瑟數年事况當衰亂何所期
浩蕩青崖足寡累不爾歡娛須極意後人勿復空憔悴

分詠西京雜記得新豐

考證明史藝地理志西安府臨潼縣漢曰新豐又渭南縣本漢新豐

縣地 蔡氏廣輿記新豐城在臨潼縣漢高帝因太上皇思故豐里乃建此城徙豐人實之故曰新豐 案幾社合彙是時分詠者舒章得斬蛇劔宗遠得石鯨勒 尚得慶安世彝仲得賈佩蘭

天上沈沈肅紫清漢王宮闕崔嵬嶢嶢長樂殿前拜天子
太公寂寞無歡聲憶昔初從豐沛遊少年屠狗相徵求
鄉里呼作亭長父其樂不減秦諸侯他時拔刀授龍子
相將約束長安裏搖搖故鄉不可卽貴人歷落徒爲爾

一朝天力移新豐萬室巧匠經營中山東故人歸帝里
雖存禮數歡娛同人生富貴豈不足何爲貧困復堪慕
秦家遊俠氣未衰漢帝衣冠禮相誤嗚呼隆準眞乃公
豁達大度眞若翁

學義山燒香曲

小欄春放煙未緝靜夜花飛懸露溼楚宮猛獸光晃晃
劫灰葬火香雲泣海山雷擊枯枝紅千年沈水涎龍宮
嬌娥纖手擘小炷調絃剔蠟迎新風玉鳳顫聲霜影瘦
月涼桂墮蟾蜍鬪雲母雙屏漏細烟夢染玉肌通翠袖
香壓茱萸透體蓮瑤瓊幽暖清眸眠觸手暗帳凝芳澤

守宮收骨膏餘妍濃酣散浪紅蘭液髯燕粉蛾不得惜
啟幃星落空光白春野荒荒豔魂魄

老將行

漢兵 漠南空捷書夜奏烽火紅公卿紛紛選爵里
天子大開明光宮是時檄召冠蓋侯雲連甲第長安中
少年搃擊獻奇計塞上悲歌獨老翁借問翁爲誰曾守
右北平當年率師臨盛秋 不敢稱其名暗中射石

黃雲冷白晝騰虎俱崢嶸徒誇結髮已百戰未得一當

兵年年出師作裨將帳下健兒多專城繇來功高
賞不酬惟有茂陵輕封侯數奇縱遇高皇帝豈得便與

韓彭侔君家丞相在中下何況長平冠軍眞傑者

登州行

作于四五月間 考證明史地理志山東登州府元登州屬般陽路洪武九年升爲府

山東無兵八九年遼人一夜成豺虎千邨寂歷烟火微
燼邑殘城滿鞞鼓新年轉戰渤海上登州將士猶無數
青旗倒折赤幘來哭聲斷處同時脯祇存美女及衣冠
兩城百萬今爲土昂然橫玉二大酋高檣錦纜凌滄洲
隨風吳越抵交廣東 乘清秋竊聞朝議且曲赦

此事若成方百憂未必田橫有義士大者爲王小者侯
老鳴幸死假雛翼易軍擁帥椎犖牛遼東健兒亦愚曠
昔日 殘首領縣官收爾新長成彎弓射日孤雲冷

止令天下軍心強叛服無常盡馳騁吁嗟朝廷方用兵
負恩不滅威難行

考證通鑑輯覽崇禎四年冬閏月登州遊擊孔有德反有德與耿仲明李九成皆毛文龍部曲文龍死走入登州登萊巡撫孫元化官遼久素言遼人可用乃以有德仲明爲遊擊九成亦爲偏裨大凌圍急元化遣有德等赴援抵吳橋天大雨雪衆無所得食一卒與諸生角有德答之衆大譁九成先賣銀市馬塞上用盡無以還適至聞衆怨遂與其子應元帥部卒劫有德有德從之還兵大掠陷陵縣臨邑商河殘齊東圍德平旣而舍去陷青城新城山東巡撫余大成聞變遣兵往禦連敗乃移兵追賊而元化軍亦至與大成皆力主撫檄賊所過郡縣無邀擊于是賊佯許元化降遂抵登州元化遣將張燾率遼兵駐城外總兵官張可大發南兵拒賊戰方勝燾遽退可大兵遂敗燾兵半降賊遣歸爲內應士民爭請弗容入元化不從中軍耿仲明都司陳光福等夕舉火導賊自東門入城遂陷元化自刎不殊與同城各官俱執惟可大死之有德乃推九成爲主已次之仲明又次之用巡撫關防檄州縣兵餉而令元化移書大成求撫大成聞于朝爲言官所劾帝革大成元化職候勘

遲暮行

無情忘白日有情泣年期是以覆巖深澗之松柏蠹菌
千載梁棟姿渥洼神馬三歲無人乘跳舞朔風心何悲
君不見東鄰嫫母三十嫁老農欣動盛飾常蚩蚩又不
見西施十五六空房怨豔傷失時邱壑自有物天地何
得久相欺風塵稍稍壯士喜拔劍起舞呼龍螭婦人醇
酒何物哉不能忽奮難驟衰世上白髮紛紛何足數獨
我年少劇可危

妍歌

青玉流寒雲照臺雙成弄影香霧開鴨綠屏風綴玫瑰
縈嬌綰豔雜烟來紅絃沈沈壁閒雨銅鋪凍斷幽紋古

花更搖夜蘭思苦銀燈背人浩無主
嬋娟抱夢歡魂盡
春山入懷隔秋浦
敲璫踏鸞望河鼓
我爲楚歌若楚舞

邊風行

十月居延邊草死黃風吹沙萬餘里
落日半照牛與羊
入暮胡笳馬上起
枯桑淅淅雜聲來
城頭鳴角何時已
千烽齊過玉門關
一聲夜渡黃河水
鷓鴣宵啼啄戰場
白狐青冢燐光紫
此時將軍歸帳中
霜戈壁立月在空
金鏡十部盡胡樂
屈卮舞女酬新功
美人起唱伊州曲
颯然四坐生悲風
回首中朝冠蓋子
賜貂方出明光宮

壯遊行

送董子也 考證今世說董俞字蒼水一稱樗亭江南華亭人遂初少宰孫也童時喜讀古人詩略上口卽能爲聲

偶之言父師見而叱之乃吟咏自如不少奪庚子舉孝廉與兄進士
鷹石並以才名顯後坐公事摧挫不得用於世卜築南邨方塘
小樹竹翠花深灌園鋤菜歌嘯自得
雖突烟常冷意豁如也案闍石名含

董生今年匹馬走江外我爲疑之久徘徊羣盜倏忽滿
天地諸公寂寞無雲雷中原惟馳白羽箭燕市誰築黃
金臺九關秋風虎豹怒三河曉霧蛇豕來拔劔斫之非
汝力蕭條千里空塵埃董生笑謂爾不知十年以來嘗
好奇結交半在五陵下學道時歷三山期方士新獻壓
虎術廝養能獲射雕兒去年種田地肺山今年牧羊東
海涯我輩龍蛇不可測豈得便採商山芝渡江十月淮
陰城鴟鵂雁相哀鳴黃河獵獵吹天外彭城落日高

原明山東故人久相待有吳君子舊知名昨夜山中射
兩狼解鞍且坐爲爾烹官軍近日渡膠水鯨波餘孽猶
縱橫有書可射聊城下有酒可卻萊夷兵忽然念作并
州歌挾旅夜走桑乾河揚鞭入帝里宮殿何峩峩稍易

儒冠拜學士

董子省其祖學士公

歸來仍著紅錦鞵亦有金張共

出入豈無李趙相經過選人不就太常祝夜飲不逢小

尉呵燕姬一曲那可畱傲然大舶凌滄洲尺書別島効

奇計樓船屬國恣遨遊或回榆關外轉歷青海頭但言

遼西樂不言遼西愁白衣緩帶河海客挾策且試東諸

侯長揖高坐諸將上紛紛參佐無風流東裝又出趙邯

鄆更將西入秦長安雲中北望 千帳榆林傳烽遮賀

蘭將軍守邊盡金注王公設險無泥丸高旗大纛但強

飯短刀長鋏憂忘餐人生會當有鱗翼時來便得成一作

乘

羽翰萬里之行豈足道青天肅肅路漫漫我聞君語

生雄風燕南冀北萬馬空或授黃石書且遇採藥翁朝

泛羆貊境暮宿新秦中古來英雄各如此後人戚戚何

其窮我今亦將取侯印移封更乞蓬萊宮安能徒作老

文士天下健者獨董公

考證松江府志董羽宸字原孚萬歷四十一年進士餘姚知縣遷授御史巡按

山東平妖寇有功歷任順天府丞光祿寺卿副都御史吏部右侍郎 吳偉業

董蒼水詩稟序余初與雲間董遂初先生遊時先朝方行保舉法諸生用薦者

集闕下先生以吏部郎攝部事考其德藝而進退之後二十餘年識先生之孫

孝廉蒼水偕其兄進士君闕石俱以才名顯其鄉案董宗伯其昌天啟二年曾爲翰林學士而是時已拜南京禮部尚書董少宰羽宸爲闕石蒼水之祖而府志不言其曾爲學士姑註此以俟再考

池上寒月與客集宗遠園亭限如字

案朱灝字宗遠註見年譜天啟

五年宗遠園亭在郡城西郊之超果寺南中有定尋堂爲幾社諸君子遊覽處見抱真堂集註

碧雲素月相躑躅
九秋楚客神清虛
流烟娟娟臨廣除
高天飛霜獨愁予
幽潭不動寒有餘
枯林窸窣光崎嶇
上有棲鳥下有魚
羣影淡豔傷哉疎
命客爲我停望舒
旣醉且攬雙成袂
竦身凌競高涼居
何以贈之璠與璵
今我不樂將焉如

陳李倡和集

春寒曲

曉萼籠烟愁暈薄
小院青苔寒漠漠
搖紅斗帳眠香姬
幽雨如花向風落
浪鶯啼溼相思樹
玉蟾鏡冷胭脂暮
草心欲碧涼颺吹
朱樓遙對傷心路
屏風曲曲黃金徽
雲容嬌凍凝薔薇
添偷鶯帶腰肢束
沈檀銀鴨試春衣

春煖曲

鷓鴣沙頭弄晴態
高枝烘日遙相對
淺莎酣碧玉輪歸
絲鞭搖曳東風碎
長郊金縷烟無主
飛花茫茫啼杜宇
嬾卸單衫杏子黃
繡戶酒紅初罷舞
羅幕亭亭日正中
蜂翻鶯語近簾櫳
慵起枕痕射窗影
無數美人春夢空

花朝大風

柳絲欲長梅欲落蜂語紛紛上樓閣嬌娃睡起凭雕欄
搖蕩春波弄金雀鈴音碎動參差風花竿倒折莓苔紅
羲和高蹄雲外沒金縷翠羽搖藍空十二樓前吹不足
輕沙獵獵寒鱗玉飄零蝶粉依妝臺一夜露香初翦綠
裁綃畫作星辰旗植護西園桃李枝願保紅顏豔仙籍
狂風妒雨知爲誰

寒食雨郊行

年年二月烟雨時遊人芳草多傷離卽今桃花久欲放
十日春風吹不知幽麗紛紛野中暮欲往從之心孔悲